

ИЗОБРАЗИТЕЛЬНЫ.

Неделя 30 по Пятидесятнице. 23 декабря 2018 года.

Мучеников Мины, Ермогена и Евграфа. Глас 5.

Псалом 102

Благослови, душе моя, Господа, и вся внутренняя моя имя святое Его; благослови, душе моя, Господа, и не забывай всех воздаяний Его, очищающего вся беззакония твоя, изцеляющего вся недуги твоя, избавляющего от истления живот твой, венчающего тя милостию и щедротами, исполняющего во благих желание твое: обновится яко орля юность твоя. Творяй милостыни Господь и судьбу всем обидимым. Слова пути Своя Моисеови, сыновом Израилевым хотения Своя. Щедр и милостив Господь, долготерпелив и многомилостив. Не до конца прогневается, ниже во век враждует: не по беззаконием нашим сотворил есть нам, ниже по грехом нашим воздал есть нам. Яко по высоте небесней от земли, утвердил есть Господь милость Свою на боящихся Его: елико отстоят востоцы от запад, удалил есть от нас беззакония наша. Якоже щедрит отец сыны, ущедрит Господь боящихся Его. Яко той позна создание наше, помяну, яко персть есмь. Человек, яко трава дние его, яко цвет сельный, тако оцветет; яко дух пройде в нем, и не будет, и не познает ктому места своего. Милость же Господня от века и до века на боящихся Его, и правда Его на сынех сынов, хранящих завет Его и помнящих заповеди Его творити я. Господь на Небеси уготова Престол Свой, и Царство Его всеми обладает. Благословите Господа вси Ангели Его, сильнии крепостию, творящии слово Его, услышати глас словес Его. Благословите Господа вся силы Его, слуги Его, творящии волю Его. Благословите Господа вся дела Его, на всяком месте владычества Его, благослови, душе моя, Господа.

Слава Отцу и Сыну и Святому Духу.

Псалом 145

Хвали, душе моя, Господа. Восхваляю Господа в животе моем, пою Богу моему, дондеже есмь. Не надейтесь на князи, на сыны человеческия, в нихже несть спасения. Изыдет дух его и возвратится в землю свою; в той день погибнут вся помышления его. Блажен, емуже Бог Иаковль Помощник его, упование его на Господа Бога своего, сотворшаго небо и землю, море и вся, яже в них; хранящаго истину в век, творящаго суд обидимым, дающаго пищу алчущим.

Господь решит окованья, Господь умудряет слепцы; Господь возводит низверженныя, Господь любит праведники. Господь хранит пришельцы, сира и вдову примет и путь грешных погубит. Воцарится Господь во век, Бог твой, Сионе, в род и род.

И ныне и присно и во веки веков. Аминь.

Песнь Господу Иисусу Христу

Единородный Сыне, и Слове Божий, безсмертен Сый и изволивый спасения нашего ради воплотится от святыя Богородицы и Приснодевы Марии, непреложно вочеловечивыйся; распныйся же, Христе Боже, смертью смерть поправый, Един сый Святыя Троицы, прославляемый Отцу и Святому Духу, спаси нас.

БЛАЖЕННЫ

БЛАЖЕННЫ, глас 2:

Во Царствии Твоем помяни нас, Господи, егда приидеши, во Царствии Твоем.

Стих: Блажени нищии духом, яко тех есть Царство Небесное.

Стих: Блажени плачущии, яко тии утешатся.

Стих: Блажени кротции, яко тии наследят землю.

Стих: Блажени алчущии и жаждущии правды, яко тии насытятся.

Стих: Блажени милостивии, яко тии помиловани будут.

Разбойник на кресте Бога Тя быти веровав, Христе,/ исповеда Тя чисте от сердца,// помяни мя, Господи, вопия, во Царствии Твоем.

Стих: Блажени чистии сердцем, яко тии Бога узрят.

Иже на древе крестнем/ жизнь процветшаго роду нашему,/ и изсушивша юже от древа клятву,// яко Спаса и Содетеля согласно воспоим.

Стих: Блажени миротворцы, яко тии сынове Божии нарекутся.

Смертию Твоею, Христе,/ смертную разрушил еси силу,/ и совоздвигл еси иже от века умершья,// Тя поющия истиннаго Бога и Спаса нашего.

Стих: Блажени изгнани правды ради, яко тех есть Царство Небесное.

На гроб Твой, Христе, пришедша жены честныя,/ искаху Тя, Жизнодавче, миропомазати,// и явися им ангел вопия: воскресе Господь.

Стих: Блажени есте, егда поносят вам, и изженут, и рекут всяк зол глагол на вы, лжуще Мене ради.

Распеншу Ти ся, Христе, посреде двою осужденною разбойнику,/ един убо хуля Тя, осужден бысть праведне:// другой же исповеда Тя, в рай вселися.

Стих: Радуйтесь и веселитесь, яко мзда ваша многа на Небесех.

Ко апостолов лику пришедша жены честныя,/ возопиша: Христос воскресе,// яко Владыце и Содетелю Тому поклонимся.

Слава Отцу и Сыну и Святому Духу. Троице Нераздельная,/ Единице Вседетельная и Всесильная,/ Отче, Сыне и Святой Душе,// Тебе поем Истинного Бога и Спаса нашего.

И ныне и присно и во веки веков. Аминь. Радуйся, одушевленный Храме Божий и Врата Непроходимая;/ радуйся, неопалимый и огнеобразный Престоле;// радуйся, Мати Еммануила, Христа Бога нашего.

Тропарь воскресеный: Собезначальное Слово Отцу и Духови,/ от Девы рождшееся на Спасение наше,/ воспоем, вернии, и поклонимся;/ яко благоволи Плотию взыти на Крест,/ и смерть претерпети,/ и воскресити умершия// славным воскресением Своим.

Тропарь мучеников: Воздержанием страстей огнепальныя/ умертвивше зраки и движения, Христовы мученицы,/ прияша благодать недуги отгоняти немощных/ и живше и по кончине чудодествовати./ Воистинну чудо преславно,/ яко кости наги источают исцеления,// слава Единому и Создателю Богу

Слава Отцу и Сыну и Святому Духу; кондак мучеников: Добропесенный глас твоих словес,/ Ермогена из глубины погибели возвед,/ постави на камени жизни,/ отонудуже и Евграф, царя обличив,/ радуяся, посекается в славную главу,// но прилежно моли, Мино, спастися всем, любовию чтущим тя.

И ныне и присно и во веки веков. Аминь; кондак воскресеный: Ко аду, Спасе мой, сошел еси,/ и врата сокрушивый яко всемогущий,/ умерших, яко Создатель, совоскресил еси,/ и смерти жало сокрушил еси,/ и Адам от клятвы избавлен бысть, Человеколюбче;/ темже вси зовем:/ спаси нас, Господи.

Трисвятое

Святой Боже, Святой Крепкий, Святой Безсмертный, помилуй нас. (*Трижды без поклонов.*)

Слава, и ныне: Святой Безсмертный, помилуй нас.

Святой Боже, Святой Крепкий, Святой Безсмертный, помилуй нас.

Прокимен перед Апостолом
ПРОКИМЕН ВОСКРЕСНЫЙ, ГЛАС 5:

Ты, Господи, сохраниши ны, и соблюдеши ны/ от рода сего и во век.

Стих: Спаси мя, Господи, яко оскуде преподобный.

МУЧЕНИКОВ, ГЛАС 4:

Святым, иже суть на земли Его,/ удиви Господь вся хотения своя в них.

АПОСТОЛЬСКОЕ ЧТЕНИЕ ДНЯ:
КОЛ., ЗАЧ. 258 (ГЛ. 3, СТ. 12-16)

К колоссаем послания святого апостола Павла чтение:

Братие, облецытеся убо, якоже избраннии Божии, святы и возлюбленни, во утробы щедрот, благодать, смиренномудрие, кротость и долготерпение, приемлюще друг друга и прощающе себе, аще кто на кого имать поречение: якоже и Христос простил есть вам, тако и вы. Над всеми же сими стяжите любовь, яже есть союз совершенства. И мир Божии да водворяется в сердцах ваших, в оньже и звани бысте во едином теле: и благодарни бывайте. Слово Христово да вселяется в вас богато, во всякой премудрости, учаще и вразумляюще себе самех во псалмех и пениих и песнях духовных, во благодати поюще в сердцах ваших Господеви.

АПОСТОЛЬСКОЕ ЧТЕНИЕ МУЧЕНИКОВ:
ЕФ., ЗАЧ. 233 (ГЛ. 6, СТ. 10-17)

КО ЕФЕСЕЕМ послания святого апостола Павла чтение:

Братие, возмогайте о Господе и в державе крепости Его, облецытеся во вся оружия Божия, яко возмощи вам стати противу кознем диавольским, яко несть наша брань к крови и плоти, но к началом и ко властем и к миродержителем тмы века сего, к духовом злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшесь в броня правды, и обувше нозе во уготование благовествования мира, над всеми же восприимше щит веры, в немже возможете вся стрелы лукаваго разжженные угасити. И шлем спасения восприимите, и мечь духовный, иже есть глагол Божий.

АЛЛИЛУАРИЙ ВОСКРЕСНЫЙ, ГЛАС 4:

Аллилуия, аллилуия, аллилуия.

Стих: Милости Твоя, Господи, во век воспую, в род и род возведу истину Твою усты моими.

Аллилуия, аллилуия, аллилуия.

АЛЛИЛУАРИЙ МУЧЕНИКОВ, ГЛАС 4:

Стих: Воззваша праведнии, и Господь услыша их.

Аллилуия, аллилуия, аллилуия.

ЕВАНГЕЛЬСКОЕ ЧТЕНИЕ ДНЯ:

Лк., зач. 91 (гл. 18, ст. 18-27)

ОТ ЛУКИ СВЯТАГО ЕВАНГЕЛИЯ ЧТЕНИЕ:

Во время оно, человек некий приступи ко Иисусу, искушая Его, и глаголя: Учителю благий, что сотворив, живот вечный наследствую? Рече же ему Иисус: что Мя глаголеши блага? Никтоже благ, токмо един Бог. Заповеди веси, не прелюбы твори, не убий, не укради, не лжесвидетелствуй, чти отца твоего и мать твою. Он же рече: вся сия сохраних от юности моя. Слышав же сия Иисус рече ему: еще одинаго не dokonчал еси, вся, елика имаши, продаждь и раздай нищым, и имети имаши сокровище на небеси, и гряди вслед Мене. Он же слышав сие, прискорбен бысть, бе бо богат зело. Видев же его Иисус прискорбна бывша, рече: како не удобь имущии богатство в Царствие Божие внидут. Удобее бо есть вельбуду сквозе иглине ушы проити, неже богату в Царствие Божие внити. Реша же слышавшии: то кто может спасен быти? Он же рече: невозможная у человек возможна суть у Бога.

ЕВАНГЕЛЬСКОЕ ЧТЕНИЕ МУЧЕНИКОВ:

Лк., зач. 106 (гл. 21, ст. 12-19)

ОТ ЛУКИ СВЯТАГО ЕВАНГЕЛИЯ ЧТЕНИЕ:

Рече Господь Своим учеником: внемлите от человек, возложат на вы руки своя и ижденут, предающе на сонмища и темницы, ведомы к царем и владыкам, имене Моего ради, прилучится же вам во свидетельство. Положите убо на сердцах ваших, не прежде поучатися отвещавати. Аз бо дам вам уста и премудрость, ейже не возмогут противитися или отвещати вси противляющиися вам. Предани же будете и родители и братиею и родом и други, и умертвят от вас. И будете ненавидими от всех имене Моего ради. И влас главы вашей не погибнет. В терпении вашем стяжите души ваша.

Слава Тебе, Господи, слава Тебе (*поклон*).

Помяни нас, Господи, егда приидеши во Царствии Твоем. (*Поклон.*)

Помяни нас, Владыко, егда приидеши во Царствии Твоем. (*Поклон.*)

Помяни нас, Святой, егда приидеши во Царствии Твоем. (*Поклон.*)

Лик небесный поет Тя, и глаголет: Свят, Свят, Свят Господь Саваоф, исполнь Небо и земля славы Твоея.

Стих: Приступите к Нему и просветитесь, и лица ваша не постыдятся.

Лик Небесный поет Тя, и глаголет: Свят, Свят, Свят Господь Саваоф, исполнь Небо и земля славы Твоея.

Слава: Лик святых Ангел и Архангел, со всеми Небесными силами поет Тя, и глаголет: Свят, Свят, Свят Господь Саваоф, исполнь Небо и земля славы Твоея,

И ныне: Верую во единого Бога Отца Вседержителя, Творца Небу и земли, видимым же всем и невидимым. И во единого Господа Иисуса Христа, Сына Божия, Единородного, Иже от Отца рожденного прежде всех век. Света от Света, Бога истинна от Бога истинна, рожденна, не сотворенна, единосущна Отцу, Имже вся быша. Нас ради человек, и нашего ради спасения сшедшаго с Небес, и воплотившагося от Духа Свята и Марии Девы, и вочеловечшася. Распятого же за ны при Понтийстем Пилате, и страдавша, и погребена. И воскресшаго в третий день по Писанием. И возшедшаго на Небеса, и сидяща одесную Отца. И паки грядущаго со славою судити живым и мертвым, Егоже Царствию не будет конца. И в Духа Святаго, Господа Животворящаго, Иже от Отца исходящаго, Иже со Отцем и Сыном спокланяема и сславима, глаголавшаго пророки. Во едину Святую Соборную и Апостольскую Церковь. Исповедую едино крещение, во оставление грехов. Чаю воскресения мертвых, и жизни будущаго века. Аминь.

Прошение

Ослаби, остави, прости, Боже, прегрешения наша, вольная и невольная, яже в слове, и в деле, яже в ведении и не в ведении, яже во дни и в ночи, яже во уме и в помышлении: вся нам прости, яко Благ и Человеколюбец.

Отче наш, Иже еси на Небесех! Да святится имя Твое, да приидет Царствие Твое, да будет воля Твоя, яко на Небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Кондак воскресный: Ко аду, Спасе мой, сошел еси,/ и врата сокрушивый яко всемогущий,/ умерших, яко Создатель, совоскресил еси,/ и смерти жало сокрушил еси,/ и Адам от клятвы избавлен бысть, Человеколюбче;/ темже вси зовем:/ спаси нас, Господи.

Кондак мучеников: Добродетельный глас твоих словес,/ Ермогена из глубины погибели возвед,/ постави на камени жизни,/ отонудуже и Евграф, царя обличив,/ радуясь, посекается в славную главу,// но прилежно моли, Мино, спастися всем, любовью чтущим тя.

Господи, помилуй. (12 раз.)

Всесвятая Троице, единосущная державо, нераздельное царство, всех благих вина, благоволи же и о мне грешнем, утверди, вразуми сердце мое, и всю мою отыми скверну. Просвети мою мысль, да выну славлю, пою и поклоняюсь, и глаголю: Един Свят, Един Господь, Иисус Христос, во славу Бога Отца. Аминь.

Буди имя Господне благословено отныне и до века. *(Трижды с поклонами.)*

Слава, и ныне:

Псалом 33

Благословлю Господа на всякое время, выну хвала Его во устех моих. О Господе похвалится душа моя, да услышат кротции и возвеселятся. Возвеличите Господа со мною, и вознесем имя Его вкупе. Взысках Господа, и услыша мя, и от всех скорбей моих избави мя. Приступите к Нему и просветитесь, и лица ваша не постыдятся. Сей нищий воззва, и Господь услыша и, и от всех скорбей его спасе и. Ополчится Ангел Господень окрест боящихся Его, и избавит их. Вкусите и видите, яко благ Господь: блажен муж, иже уповае на Нань. Бойтесь Господа, вси святии Его, яко несть лишения боящимся Его. Богатии обнищаша и взалкаша: взыскающии же Господа не лишатся всякаго блага. Приидите чада, послушайте мене, страху Господню научу вас. Кто есть человек хотяй живот, любяй дни видети блага? Удержи язык твой от зла, и устне твои, еже не глаголати лести. Уклонися от зла и сотвори благо, взыщи мира и пожени и. Очи Господни на праведныя, и уши Его в молитву их. Лице же Господне на творящия злая, еже потребити от земли память их. Воззваша праведнии, и Господь услыша их, и от всех скорбей их избави их. Близ Господь сокрушенных сердцем, и смиренныя духом спасет. Многи скорби праведным, и от всех их избавит я Господь. Хранит Господь вся кости их, ни единая от них сокрушится. Смерть

грешников люта, и ненавидящие праведного прегрешат. Избавит Господь души раб Своих, и не прегрешат вси уповающие на Него.

ОКОНЧАНИЕ ИЗОБРАЗИТЕЛЬНЫХ

Достойно есть яко воистину блажити Тя Богородицу, Присноблаженную и Пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем (*поклон*).

Слава (*поклон*), и ныне: (*поклон*). Господи помилуй. (*Трижды*). Господи, благослови. (*поклон*)

Воскресый из мертвых, Господи, Иисусе Христе Сыне Божий, молитвами Пречистыя Твоея Матери, святых, славных и всехвальных апостол, преподобных и богоносных отец наших, святаго (*празднуемого в этот день*) и всех святых помилуй и спаси нас, яко благ и Человеколюбец. Аминь.

Многолетие

Православное Епископства Церкви Российской, и господина нашего Высокопреосвященнейшаго (*имярек*), митрополита *или* архиепископа (*титул*), и господина нашего преосвященнейшаго епископа (*имярек*) (*титул*), настоятеля, клир и прихожан святаго храма сего (*или* братию общины сия), и вся православные христиане, Господи, сохрани их на многая лета!

Господи, помилуй. (*Трижды*.)